



**4 Vokabulario**

**Un bishita na museo**

Marla i Sheila ta amiga. Marla ta biba na Kòrsou i Sheila na Boneiru. Algun luna pasá Sheila a keda poko dia serka Marla. El a pasa masha bon mes. P'esei Sheila ta masha kontentu ku e siman akí e ta biaha pa Kòrsou atrobe. E ta kompaniá wela. Welita ta bai hasi kompra, miéntras Sheila ta pasa un wikènt largu serka Marla. E dos amiganan ta bira loko di kontentu ora nan mira otro. 'Mami a pensa un kos dushi atrobe pa nos hasi awe,' Marla ta bisa Sheila. 'Nos ta bai bishitá Museo di Kòrsou.' Marla ta mustra Sheila un portrèt di e museo. 'E museo parse un lanthùis,' Sheila ta bisa miéntras e ta studia e plachi. 'Antes tabatin un hospital den e edifisio ei,' Marla ta splika. 'Un hospital di karentena. Ei pashènt ku tabatin malesa kontagioso, esta ku ta pega otro hende, tabata keda. Pero laga nos ban pafó awor. Mi ta kere ku mama ta warda nos den outo kaba.' Despues di a kore un ratu, mama ta bisa: 'Nos ta yegando.' Sheila ta rèk garganta pa wak si e ta rekonosé e edifisio. Mama ta parker e outo. Den e museo nan ta pasa den diferente sala. Mama ta mustra e ophetonan i ta konta algu di nan. E muchanan ta mira un shanguilié i hopi muebel antik, esta muebel di ántes ku tin masha balor. 'Ken a traha tur e muebelnan bunita akí?' Sheila ta puntra. 'Un ebanista, tambe yamá karpinté fini. E sa e arte di traha muebel di kalidat. Esei e ta hasi ku palu fini manera palu di mahòk,' mama ta bisa.

Marla i Sheila ta mira un kushina di ántes tambe. E murayanan ta ifèrf kòrá ku bala blanku. Den un otro sala, e sala di eksposishon, e muchanan ta mira kuadro i eskultura presioso. Te patras den e museo mama ta mustra nan un kariòn. 'Un kariòn ta un instrumento musikal ku ta konsistí di vários klòk i un teklado,' mama ta splika. 'Tur dia un kariònista ta toka e instrumento akí. E ora ei tur hende den bario ta tende e tononan maravioso di e klòknan, ku ta flota den aire.' Marla i Sheila ta para skucha mama boka habrí. Den kèlder di e museo tin un kolekshon di opheto di indjan ku a biba hopi aña pasá riba nos isla. Pa finalisá nan bishita, mama, Marla i Sheila ta bai kana den kurá di museo kaminda nan ta mira un lokomotif. Den un sala chikí patras den kurá tin parti di e promé oroplano ku a baha na Kòrsou, esta Snip. Ora nan ta kore bai kas, Sheila ta bisa: 'Esaki tabata un dushi dia. Mi ta kontentu ku e wikènt akí mi por a bin Kòrsou atrobe.'

**Tarea 1**

- Kiko bo ta yena?
- Lesa e frase bou di kada pintura.
- Buska e palabra ku falta, den e rei aki bou.
- Skibi e palabra den bo skref.

- antik
- ebanista
- eksposishon



Un ... ta un lugá kaminda bo por admirá kuadro, eskultura, muebel i otro opheto interesante.



Antes tabatin un ... den e edifisio di e Museo di Kòrsou.



Muebel ... ta muebel di ántes ku masha balor.



Un karpinté fini òf un ... ta un karpinté ku ta traha kashi i otro muebel presioso.



Ora tin un ..., bo por bai admirá kuadro i otro opheto spesial.



Un ... ta un instrumento musikal ku ta konsistí di vários klòk i un teklado.

**Tarea 2**

- Un pintor por pinta riba kanvas, un sorto di paña pa pinta ariba. Riba kiko mas un pintor por pinta?
- Un pintor por kologá su kuadronan den un museo pa públiko por bin

wak. Unda mas e por kologá su pinturanan pa hende bin admirá nan?

**Tarea 3**

- Bo por mensioná un museo na Aruba òf Boneiru?

- quarantaine ziekenhuis
- hospital di karentena
- klòklespel
- kariòn
- nashonal museum
- museo nashonal

### 5b Kua splikashon bo ta skohe?

- Skohe pa kada palabra e splikashon korekto.

1. ebanista  
a. karpinté ku sa e arte di traha muebel fini ku palu di kalidat  
b. karpinté ku sa kon mester traha muebel
2. shanguilié *Kroonluchter*  
a. lampi di kristal  
b. lampi di kristal ku hopi brasa i bela
3. muebel antik  
a. muebel di mas ku shen aña bieu  
b. muebel ku un estilo diferente
4. kariòn  
a. klòk ku bò ta haña den toren di misa  
b. un instrumento musikal ku ta konsistí di vários klòk i un teklado
5. sala di eksposishon  
a. un lugá kaminda bo por atmirá por ehèmpel kuadro i eskultura presioso  
b. un kamber ku kuadro na muraya
6. hospital di karentena  
a. un hospital pa pashènt spesial  
b. un hospital kaminda pashènt, ku tin un malesa kontagioso, esta ku por pega otro hende, ta keda